

Perëndia Është Me Ne (seria e Krishtlindjes, pjesa 3 nga 4)

Përshëndetje kisha jonë! Gëzuar nga unë dhe gruaja ime.

Nëse je anëtar i kishës sonë, ose nëse ke hyrë rastësisht, unë besoj që nuk është rastësi, Perëndia do që të komunikojë diçka të veçantë me ty sot ndërkohë që mbaroi ky vit dhe po fillon viti i ri.

Dua shumë të fokusohem te të njëjtat katër fjalë që kemi folur për disa javë tashmë: **Perëndia është me ne**. Jeta ka shumë ulje dhe ngritje. Një gjë që do doja të mos e harroje kurrë gjatë gjithë vitit që po vjen është: **Perëndia është me ty**. Ti nuk e di çfarë do të sjellë ky vit, çfarë gjërash të bukura, çfarë sfidash, por Perëndia e di dhe do të jetë me ty çdo ditë të këtij viti.

Vargu që kemi folur këto 4 të diela ka qenë nga Mateu 1:23,

Mateu 1:23 *"Ja, virgjëresha do të mbetet shtatzënë dhe do të lindë një djalë, të cilit do t'i venë emrin Emanuel, që do të thotë: "Perëndia me ne"!"*

Perëndia është me ne, kjo është e vërteta më unike dhe më e veçantë e gjithë Krishtërit. Fjala që përdoret për këtë quhet ndryshe 'Mishërimi i Perëndisë.' Ai u bë njeri, u bë si ne, mori trajtë njeriu, me mish dhe kocka si ne, në trupin e Jezus Krishtit.

Një përshkrim i bukur është te Ungjilli i Gjonit.

Gjoni 1:1,14 *'Në fillim ishte Fjala dhe Fjala ishte pranë Perëndisë, dhe Fjala ishte Perëndi. Dhe Fjala u bë mish dhe banoi ndër ne; dhe ne soditëm lavdinë e tij, si lavdia e të vetëmlindurit prej Atit, plot hir e të vërtetë.'*

Kjo është shumë e veçantë dhe e fuqishme. Jezusi, Fjala, u bë mish, u bë njeri dhe banoi ndër ne si njeri, për të treguar se sa shumë na do Perëndia ne.

Fryma e ngjizi Jezusin te një vajzë adoleshente në Izrael, që quhej Maria. Ajo ndenji 9 muaj shtatzënë, si çdo lindje, nuk erdhi më shpejt edhe pse ishte Biri i Perëndisë, por u bë njeri dhe erdhi si njeri, siç vijnë të gjithë njerëzit. Dhe kaloi fazat njerëzore si çdo njeri, e bëri këtë që të ishte plotësisht si ne dhe plotësisht me ne, sepse Ai do të quhet...

Emanuel—Perëndia është me ne

Perëndia nuk mund të na e tregonte nga qielli se sa na donte ne, prandaj zbriti në tokë për të na treguar se sa e madhe është dashuria e Tij për ne, për ty. Zbriti që çdo njeri të shikonte dashurinë pa kushte që Perëndia ka për ne.

Jezusi erdhi për të gjetur dhe për të shpëtuar ata që ishin të humbur, që ishin larg Perëndisë, dhe për t'u dhënë atyre jetë dhe jetën me bollëk që vjen vetëm prej Tij.

Jezusi nuk erdhi për të drejtët, për ata që mendojnë se janë në rregull me Perëndinë, por erdhi për ata që nuk po dinë si të pajtohen me Perëndinë, sepse Ai është rruga e vetme për t'u lidhur me Perëndinë, për t'u pajtuar me Perëndinë.

Jezusi erdhi për të sëmuret, jo për të shëndoshët, por për ata që kanë nevojë për të mjekuar plagët e jetës me faljen dhe mëshirën e Tij.

Nëse mendon se e ke gjetur sekretin e jetës pa Perëndinë, vazhdo në atë rrugë, por nëse rrugës has një mur të madh që e ka të shkruar me shkronja të mëdha, 'Shpëtimi është vetëm nëpërmjet Jezusit,' kthehu te Ai, sepse nëse vjen te Ai, Ai do të jetë duke të pritur.

Jezusi erdhi si një Bari i Mirë, sepse njerëzit ishin të shpërndarë dhe pa orientim si delet pa bari. Ai erdhi dhe si Bariu më i veçantë në botë, dha jetën për delet e Tij.

Jezusi erdhi për të na treguar se si ishte Perëndia. Ai tha: 'Nëse më keni parë Mua, keni parë Atin. Nëse keni dëgjuar fjalët e Mia, zërë se i ka thënë Ati. Nëse keni parë mënyrën se si veproj Unë, zërë se keni parë zemrën, pasionin dhe mënyrën se si do kishte vepruar Ati im.'

Po e mbyll me të njëjtin varg që kemi përsëritur gjatë këtyre 4 javëve:

Mateu 1:21-23 *'Dhe ajo do të lindë një djalë dhe ti do t'i vësh emrin Jezus, sepse ai do të shpëtojë popullin e tij nga mëkatet e tyre'. E gjithë kjo ndodhi që të përmbushej fjala e Zotit, e thënë me anë të profetit që thotë: "Ja, virgjëresha do të mbetet shtatzënë dhe do të lindë një djalë, të cilit do t'i venë emrin Emanuel, që do të thotë: "Perëndia me ne"'.'*

Ai do jetë Perëndia me ne, Perëndia në mish. Ai do të jetë 100% njeri, 100% Perëndi, te Ai do jetë mishëruar Perëndia. Ai do jetë Qengji i Perëndisë që u ther për mëkatet e njerëzve duke paguar me gjakun e Tij.

Ai do të quhet Emanuel, që do të thotë 'Perëndia me ne,' Perëndia që është me ty. Qëllimi i jetës së Tij ishte të kesh ti jetë, të kesh ti qëllim. Ai erdhi për të treguar në të gjitha mënyrat se sa shumë të do Perëndia ty. Ai erdhi që të sjellë Frymën e Tij të jetojë brenda teje çdo ditë. Ai është me ty, Ai është

për ty, Ai është në anën tënde.

Nëse e ke humbur rrugën, Ai është aty për të qenë udhëzuesi i rrugës tënde.

Nëse je vetëm, Ai është aty me ty për të qenë shoku yt.

Nëse je lënduar, Ai është aty me ty për të qenë ngushëlluesi yt.

Nëse ke frikë, Ai është aty me ty për të të dhënë paqen e Tij, qetësinë dhe sigurinë që vjen prej Tij.

Nëse je sëmurë, Ai është aty me ty për të qenë shëruesi yt.

Nëse ndihesh i dobët, Ai është aty me ty për të të dhënë forcë.

Nëse ndihesh i zhytur në mëkate, Ai është aty për të qenë Shpëtimtari yt.

Sepse Ai quhet Emanuel, Perëndia me ne, me ty.

Jezusi zbriti nga qielli, la lavdinë e qiellit jo për të drejtët, as për ata që mendojnë se i kanë të gjitha në vijë, as për ata që mendojnë se janë në rregull, as për ata që mendojnë se janë të shëndetshëm dhe nuk kanë nevojë për askënd. “S’ka gjë, le të ecin në rrugët e tyre; kur të pengohen, Unë këtu jam. Le të provojnë ç’të duan, le të shpikin mënyra për të qetësuar dhe pajtuar veten me Mua. Derisa të kuptojnë që nuk munden dhe se tashmë ajo rrugë, ajo mënyrë ekziston, të kuptojnë që tashmë kam ardhur në tokë, e kam krijuar, e kam shtruar rrugën, jam aty nëse duan të shikojnë dhe përjetojnë dashurinë e Perëndisë.”

Në këtë ditë, ndërsa presim fillimin e vitit të ri, kaq doja të thoja, ky është kuptimi që Perëndia u mishërua, u bë mish, u bë njeri si ne. Për të na treguar sa i mirë është Ai, për të na treguar se sa shumë na do Perëndia.

Kaq i thjeshtë dhe njëkohësisht kaq i fuqishëm është mesazhi i Perëndisë ndaj teje: Ai është Emanuel, Perëndia që është aty me ty.

Le të lutemi!

Lutja e shpëtimit!